

2. Singlamteh Telcianna: (Khen 2) Singlamteh Thuthuk

- a) Laisiangtho bulphuhte John 12:23-33; Heb. 12:1-3; Gal. 3:13;
1Cor. 1:23-25; Mark 8:34-38.

b) Thupatna

Kilemna (atonement). pen Pasion sianthona ngeina i a kalh Pasion a lungkimsak ahi hi. Tua mah bangun mihingte tunga a ma itna thukna a lakkhia zong ahi hi. Pasion in eite mawhnate hang a daantatna Zeisu puasak in eite tangin i khialhnate amah mah in pua hi (1Pet. 2:24). Thuciamlui hun a mawhna hang a biakpiakna sangin Zeisu in bang hiam khat sep beh hi. Amah pen mawhna a pua bek hilo in, tua mawhna ama adinga lakhia ngiat in eite tangmi suak hi (2Cor.5:21). Mawhna, sihna leh Satan vangliatna tang a gualzawhna pen ama sep bek hilo in, ama sung a kingah ahi hi.

c) Mawhna leh mawhnei a kilamdanna

Zeisu pen eite mawhna tawh mawhna kisuaksak takpi hi. Zeisu pen mi mawhpa kisuak sak lo hi, tua pen amah mawhnei hilo hi. Ama mawhna khatpeuh hangin Zesu daan kitat lo hi. Tua sangin eite mawhna thaman amah mah in pua hi. Zeisu in amah leh amah kawkbanglo, poina hemna om lo a kicing meihal biakna in kipia hi (Heb. 9:14). P.T. Forsyth in Zeisu thu hici gen hi, "Pasion in amah mawhna suaksak hi. Amah mawhna bangun bawl hi. Ahizong in mawhneipa bangun mu lo hi. Pasion in it tak in mihing mawhna bangun amah bawl a, ama lungkimna tawh ama sung leh ama tungah mihing mawhna thu khi hi. Khazih in mimal khialhna pulak thei ngeilo hi." Hih hi Calvary thugil Pasion in a tapa pumpi sihna ciang bek tawh mawhna thute susiang lo hi. Hi dek lo, Zeisu pen tua bang sihna sungah lut lo hi. Mihing mawhna leh Pasion thu a manlohna in meizom tampi nei a, gentehna in mihing pumpi sihna; Pasion thukhenna leh taisanna; leh natna satnate ahi hi. Hih mawhna thu leh a sukkhakte pan mihing a kihotkhiat theih nading in Tapa in hih mawhna khempeuh a lakkhiat ding kisam hi. Pasion Tapa pen eite mawhna khempeuh hong suak hi. Calvary ah zahtakna tawh i kuat ding kisam hi.

d) Mihing leh a sithei mihing a kilamdanna

Eite ngaihsut theih ciang ah mihing hihna dingin a sithei mihing hih ding ahi hi. Ahizong in Pasion in mihing a bawl cil in, a sithei , sihna nuai a kipia ding in bawl lo hi. Mihing in nuntak tawntungna singkung ne in a nuntak tawntung ding a dalna in Pasion in Eden huan pan mihingte a hawlkhiatna Gen. 3:22 ah kiteltak in hong gen hi. Ama thuman lohna hangin Pasion in mihingte a nuntakna bangun sihna nuai ah kipia hi. Laisiangtho limtak en in ciapte nate sim le cin Pasion tawh a kipat khawm hun pan tampi tomzaw ahihna mu ding hi teh. Thuciam lui hun sungin kum 120 bang bek suak hi(Gen. 6:3). Tua nangawn eite kum 70-80 bek i hing uh hi (Psa. 90:10).

Zeisu mahmah in ama ading mawhna a lak masiah mihing sihna nuai ah kipia lo hi. Banghang hiam cihleh sihna pen mawhna pan a hong kipankhia hi (Rom. 5:12). Tua hi a, Zeisu pen mawhnei hilo in, mawhna hang a hong piang sihna hang a patau pipi in nungta ngeilo hi. Zeisu pen nuntakna thuneihna nei a nungta amah bek ahi hi (John 10:17-18). Hih pen Calvary thumaan lamdang ahi hi. Khalam leh pumpi sih ding a kisam lo pa bek in, tua vangliatna a suksiat na dingin amah leh amah in tua sihna hong kisuan hi (Heb.

2:14-15). Singlamteh tunga a sipa pen a si theilo pa hi. Zeisu pen mihing hi napi si theilo hi. Gethsemane huan sunga Zeisu thuakna pen ama mai a a theih a lauhuai thumaan hang ahi hi. Mihing mawhna ama tungah kisuan in tua hangin sihna thei ding cih aman thei lua hi. Ahizong in a Pa deihna nuai ah kipumpiak hi. Leitung mihing kuamah in Zeisu tuah bang tuak dingin thahatna nei lo hi (Luk. 22:41-44).

Hih pen eite tawh Calvary vangliatna a kingakna hi. Eite in tel zo ngei lo ding i hihman in tel zawh ding hanciam ding hilo hi. Ahizong in tua mai ah kun in, a vangliatna thuthuk i san leh, tua gupkhatna thuneihna eite sungah i sang ding ahi hi.

"Kei hong it leh kei adinga amah mahmah hong kipia Pasion Tapa" (Gal. 2:20).

e) Adam a suak hilo, Pasion a suak

Zeisu nuntakna leh sihna i telcian nading in nungak siangtho pan a suahna pen thupi pha mahmah hi. Zeisu nuntakna pen ci-le-sa tawh a hihna kitel mahmah hi. Ze-etna taktak a thuakna zong up lah ding hilo hi. Ei tel theih ciangciang ah a mihing hihna zong eite mihing hihna dan mah hi (Heb. 4:15). Ahizong in midangte tawh a kilamdangsak thu khat Zeisu thu om hi. Amah sihna tungah kipia lo hi. Ama kianga tung ze-etna khempeuh gualzawh nading vangliatna nei hi. Amah pen Adam a suak hilo in, Khasiangtho a suak hi.

Mihingte leitungah a suah uh teh hih thu pen a mau ading hilo hi. Mihingte in bel Adam masa pan amau khanggui la uh hi. Adam masa pan a mau thanemna la uh hi. Adam masa pan a mau mawhna la uh hi. Zeisu pen Adam nunung hi a, vantung pa kibang in a kha kibang lo hi. Mihingte zong Khasiangtho tawh a suah mateng un tua vantung pa a mihing tawh kisutna lalo uh hi (Rom. 8:3; Jn. 1:12, 13)

f) Zeisu in mawhna zogawp hi

Zeisu in thunih ah mawhna a zawh ding kisam hi. Ama sa in, Khasiangtho vangliatna tawh Pa thu amanna kicing tawh ci-le-sa a mawhna ukna a gualzawhna nisim nuntakna ah ahi hi. Anihna ah, Pasion in mawhna tungah a thukhenna thu ah hi a, tua tungtawn in amah leh amah in mawhna daantatna ngah in, tuabang in kilemna kicing bawl a, singlamteh tunga a sihna tawh sihna vangliatna sugawp hi. Zeisu pen Adam a kibawlna mihing hihna taktak ah nungta in, tua pen thuman lohna hanga, a puk donga Adam nuntakzia ahi hi.

Zeisu in ci-le-sa pumpi taktak nei hi. Hih pen Adam a puk ma a a ci leh a sa bang hi a, ze-etna ah a puk pan eite pumpite bang lian mah ahi hi. Ahizong in Pasion Khasiangtho in uk ahihman in eite aa tawh kibang lo a, a tawp dong mawhna hihna taktak thei lo hi. Ama pumpi mahmah tawh mawhna taktak leh mawhna septheihna ah kipia hi. Ama mawhna hilo, midangte mawhna hi a, ama sungah a lauhuai sukkhaknate leh thukhennate kaikhawm hi (2Cor. 5:21). A..W. Tozer in hi ci gelh hi, "Singlamteh lui pen, sihna lim hi. Hih pen mihing hihna a bei vatna, a sugawpna ahi hi. Rome-te hun lai in a ma singlamteh pua a a pai peuhmah kilehkik ngei lo hi. Ama'n zong a kilehkik dingin kuankhia lo a, a tawp dong a sem dingin paikhia hi.

g) Dotna leh kikup khopnate

1. Luk. 22:39-46 leh Matt. 26:36-46 sim in. Hih hun a Zeisu in a kantan bang hi ci in ngaihsun in. Kua adinga sem in ngaihsun na hiam?
2. Zeisu in i mawhnate koicih hiam? (Heb. 4:15; 9:26).
3. Banghang in eite gupkhatna ding a singlamteh tunga Zeisu kipiakna Pasion ading santak suak hiam? (2Cor.5:21; Rom. 8:3-4).

4. Singlamteh tunga Zeisu nasepna tawh banghang in nuntak tawtungna ngah thei i hi hiam? (Rom. 6:5-14, 23).
5. Bang hangin Zeisu pen Adam nunung ahieh keileh Adam nihna kici hiam? (1Cor. 15:22, 45-49)

h) Tomlakna leh Zatpahna

1. Mikhempeuh ading mawhna ahi dingin i vantung Pa in mawhnei lo a Tapa siangtho pia hi.
2. Mihing in ama thuman lohna tawh ama puk nading tungsak a, ahizong in tua vangliatna usia leh eite hong suaktasak hi.
3. Zeisu pen eite tangmi hi. Eite tawh kituak daantatna pen Calvary singlamteh tungah mawhneilo amahmah in pua hi.
4. Zeisu in eite ading bangzah hong thuaksak cih i phawk ciangin, eite sep theih bangmah om lo a, ama hong sawl bangin i singlamteh pua in ama nung i zuih ding bek ahi hi.